

南潯志卷十八

里人周慶雲纂

人物一

宋 張茂宗 張準 張定 張翼 華文勝 華初成 華元實

史博 陸盛

元 龐樸 徐愷

張士諒 褚天祐 褚錫珪

董仁壽

明 華裕昆 華欽 華振道 華宏綱 華揚 華天民

張文顯 張立 沈貴

陸巖 陸勝觀 陸孟和 陸文 陸椿 陸敬德 陸元

南潯志 卷十八 人物一

陳理 陳謨 陳元器 夏廷 温璉 温璋

張洪 董環 董庠

趙金 陸岳 趙雋 董份 董道醇 董嗣昭 董嗣所 董嗣暉

紀濂 紀廷鉞 紀象台 紀 陸充齡

温應祿 有林 温應聘 温子正

田萬年 張斗原

朱守愚 董嗣成

許兆楨 如 朱國禎 朱絰 朱紳 朱錫 朱鑑如 朱鎔

華士嶼 華仁源 華允楨 華仁溥

莊日宣 莊思 中穎 丁樹本 吳紀澄

温育仁 王振宇

溫是 溫良學

溫傑

溫璜 溫郊瑞

董斯張

董說 董樵 董耒

陳忱

董汝煌 董嗣昂 董震蚪

董式

莊允城 莊廷鑑 莊廷鉞 莊西雍 計阿翁

莊廷鑿 莊濟 莊君佩

宋

張茂宗字克大橫渠張子之後徽宗朝知潭州南渡時自郿縣

徙家潯溪孫準定準慶元丙辰進士 按府志作慶元元年乙卯 直

祕閣待制定字雲峯以字行紹熙甲寅上舍釋褐狀元 按張志董志作

覃恩狀元湖錄作紹熙四年癸丑進士並謫潯溪文獻作高宗紹興五年尤謫 龍圖閣直學士裔孫翼

字公輔號履素明永樂甲申進士河南參政遷歸安義鴈里 按茂

南潯志 卷十八 人物一

二

宗舊志入流庸今依府志例凡子孫占籍于此者始遷之人即入人物後仿此 汪志

華文勝字彬野祖天保自無錫徙南林父初成字大成師事攷

亭朱子淳熙中以經義薦歷官兵部尚書嘗劾蘇師旦有直聲

文勝以人才舉為江州幹辦公事景定四年呂文德請開權場

於樊城文勝聞之進策督府曰是資盜糧而以樊予敵也襄樊

為東南保障無襄樊則東南不可守矣請奏停權設備不聽遂

辭疾歸家素豐好施予臨安大禋文勝運粟千斛為賑者倡嘗

施財建報國寺鐘樓佛閣又架石梁于南市本名通利居民德

之因名華家橋並所居之兜衡亦以華名焉子二元實元升元

實字端人賈似道奏買公田于浙西浙中大擾破家者眾元實

慨然以田之半輸之官似道舉為著作郎辭不受自是扁戶鎮

官每造廬求見不可得元實子璵字玉衡以薦舉爲定遠主簿時行經界推排法地尺寸皆有稅璵力請郡守凡山溪澗沼沙磧概寬推排卒于官汪志

史博字約之宋季南潯人博極窮書尤邃于易元世祖平江南求南人欲用之遠近交辟皆不就汪志

陸盛字子儀唐忠宣公贄十七世孫宋御史大夫因家世爲宋臣不甘仕元隱橫山贅於南潯唐雷翁爲壻遂遷居焉陸氏家譜

龐樸字夷簡其先單州人高祖謙孺官太常博士宋南渡游寓湖州時邸戚競寓驛騷移居松陵樸少負才名宋末補春秋弟子員賈似道聘爲塾師不赴錮不得試元初詔行臺御史程鉅

南潯志

卷十八 人物一

夫訪南士徵不起強至再出授翰林修撰奉勅修宋遼金三史同官多北人欲統金附宋樸曰昔曹魏不附蜀漢元魏不附齊梁此綱目所以重大統也今元繼宋統近接漢唐遠追三代若承金統近接遼矣遼以上無可繼者總裁不從按舊志俱作總裁脫脫不從沈登瀛曰脫脫爲三史都總裁在順帝至正三年非世祖時疑總裁當爲耶律鑄未敢臆定然非脫脫則明甚同事門人貢師道復力辨之擬轉外秩遂引疾歸居南潯趙孟頫陳孚咸與倡和自號五湖狂叟今其後人世居潯東汪志

汪志

張士諒字君聲號思齋先世居泰州士諒仕元爲提舉官于浙

西按舊志俱云安吉路提舉攷元無安吉路但有湖州路領安吉縣其田賦善農提舉皆在平江路儒學官醫提舉皆在行

省財賦提舉則平江杭州皆有之又常湖等處茶園都提舉司所統有安吉提領所並無安吉提舉故不復質言

明興遂隱于潯南之善田灣自號八十九公洪武六年徵召隱逸有

司三舉不應杜門著書以訓課其子孫今稱善田張氏者皆其

後裔也

汪志

褚天祐字善甫號友竹世居朱塢勤儉起家日增田業差役繇

重處之泰然病而無醫者施藥以濟之死而無歸者給棺以殯

之力行好事歲以為常

朱塢褚公祠

從子錫珪字君玉性沈靜究心

經史游庠序間有俊聲安定書院舉之儒臺授東陽教諭錫珪

曰吾親老且病忍一日去側耶雖不仕得朝夕侍吾親吾志滿

矣遂辭事親孝親有疾衣不解帶者累月藥餌必親嘗乃進族

有貧不自給者則貸之粟又多蓄善藥以濟人晚歲創樂閒堂

南潯志

卷十八 人物

四

築圃蒔花以自娛邦人稱之為樂閒先生

縣志

董仁壽原名珏又名辰壽字子復七世祖貞元宋政和中自海

州徙居烏程梅林里父正四縣學生仁壽博學有賢行元末父

子相戒不仕明興浙江行中書省薦於朝三徵弗就鑿石船以

隱曰石船爛吾其仕矣曾和智覺禪師明本梅花詩百首

按詩萃作

數十首楊維禎亟稱之贅於潯溪沈氏遂遷自梅林里而世居焉

汪志

明

華裕昆字容齋興元孫曾祖欽元初以博學薦授明州教授又

以經術精通薦為國子博士擢集慶路總管府判官告歸與社

學長集民之秀者講學無虛日學者稱南陽先生祖振道字文

河元宣義郎主常平坑治農田水利以父喪歸築別業於潯北彩虹橋曰曉山園父宏綱字純一元承事郎更於石澥之陽築園名小桃源以二園授二子長居南次居北稱南北房焉裕昆爲宏綱次子倜儻任俠元末張士誠割據三吳不戒於兵寇多嘯聚於具區七十二峯間裕昆倡捐結社于潯北軍吳濠并諭諸漚港俱召募鄉勇編聯保甲每甲出壯丁十人演拳棒更番持械擊柝以防竊發村多漁舟亦以保甲法十舟爲隊約盜發鳴鈺羣駕篙艫巡綽盜乃不敢犯潯人目華園爲一方保障明太祖起兵攻士誠弟於長興德清辟爲團練使使作鄉導洪武二十六年卒子揚字顯卿洪武初補弟子員至北平謁淮安侯華雲龍雲龍以子弟遠來喜甚畀以贊畫軍務先是雲龍與徐

南潯志

卷十八

人物一

五

達常遇春擊士誠兵於湖州嘉興間而南潯東遷舊館及阜林爲屯兵交戰之所雲龍以此爲族黨祖宗墳墓所在每戒軍士毋殺掠毋焚民居故下城之日民皆安堵至是鎮守北平揚從之爲合郡生民謝并爲條陳開塞諸要畧無何告歸永樂十一年卒揚子天民隱于耕朝廷訪求賢哲隱逸之士有司以薦辭不就自號無庸處士

汪志

張文顯字明光士諒曾孫祖立字吾行洪武八年徵召賢良任國子監學錄父良保縣學生文顯府學生

汪志

研經稽古重義疏

財范志成化十七年大水發粟賑饑巡按以尙義旌詔授七品散官正德五年大水復捐粟賑饑巡撫孫元貞旌曰齒德兼優有諸生某寶甚驚其女爲人婢文顯爲贖歸擇壻嫁焉饑民鄭七

聚黨數百人沿村掠食相戒勿驚張善人家文顯聞之遂隻身往見反覆開諭眾即解散里人德之卒年八十七汪志

沈貴字仲華其先本湖州人徙長洲之東蔡村留青日札後又徙烏

程之南潯縣志父祐致富不貲留青日札兄富字仲榮行三人以萬三

秀呼之天祿識餘而呼貴為萬四縣志明初富曾為太祖犒軍而築都

城三之一太祖忌欲誅之以馬后諫釋而戍滇勝朝形史拾遺記籍其

家有田數千頃劉三吾撰沈漢傑墓志貴嘗以詩諷富云錦衣玉食非為

福檀板金尊可罷休何似子孫長久計瓦盆盛酒木棉裘富不

聽貴遂隱於終南不知所終天祿識餘吳僧温日觀善畫葡萄出新

意以飛白書體為之貴傳其法亦佳農田餘話

陸巖字蘭谷太學生高祖勝觀洪武中充山西屯尉軍曾祖孟

南潯志 卷十八 人物一 六

和一名達號中和國子監苑馬寺丞祖文字宗儒號存省錫山

縣丞父椿字士齡號筠谷以征蠻有功特授錦衣衛指揮使巖

勤貨殖致富於大橋之北買顧提舉宅而新之年七十三而終

葬南柵箋一圩子長曰元吉次曰元祥元吉號槎川豪俠好義

先時里中陸敬德傭力元吉家勤學十餘年遂得入泮與元吉

同飲於馮家眾推敬德首座元吉忿然而歸年二十餘已賈二

年矣至是復刻苦劬學晝夜不輟五載而游庠嘉靖壬午恩貢

又十餘年任北直隸滿城縣仿趙廣漢治迹搏擊豪強玩法者

束手百姓安堵號為仁君邑中奸豪賄長官遂以律外加刑罷

而父老攀轅卧轍抵暮乃從間道而歸治家嚴肅內外咸敬憚

居恒賦詩飲酒以養天和年五十四而卒子充齡另有傳陸氏家譜

陳理字用和號橘莊好善樂施得異人授女科醫術名冠兩浙天順間遷居南潯南柵子謨字嘉言孫元器字子重俱為太醫院官至今世其業婦女亦知藥性人目為陳藥婆家明時有夏廷秀號怡閒由諸生膺薦辟任太醫院院判謝事數載壽終於家自是夏氏世以醫著又有董侑字遺安以醫名於時隆慶中卒

汪志

溫璉號清樂先世由太原至長興者為大司馬雲中諱祥卿以

儒士獻策明太祖佐大將軍耿炳文守長興因家焉司馬之姪

清樂復由長興遷烏程之七里溫棐忱朝列大夫長史公家傳敦行尚義鄉黨

推長者正德中舉為糧長誠實不欺縣志家富於財享年九十九

所謂百歲翁也長史公家傳按縣志引浙江通志溫璉號清樂又引湖錄溫廷玉字清樂所引事實大旨相同

南潯志

卷十八

人物一

疑一人誤曾孫璋戴田有溫號桂軒成化間解糧京師道由山

東值歲稔民競鬻妻女輸賦璋即捐所運糧千二百石代輸抵

京假貸自納事聞有旨褒異給章服縣志

張洪字柳莊文顯子汪志未冠即為諸生淹貫經史研精古學疏

財重義周急扶危儒林推重之范志宏治朝舉賢良授王府紀善

改應天府教授又改甯波府教授嘉靖丙午倭寇甯台時無行

諸生及仕宦不得志者競為鄉導入城焚掠洪及妻蕭氏妾陳

氏同殉節于官署卹諡貞愍蔭子昂入太學張氏譜按張志

舉賢良授應天學正文皇登極釋奠先師登明倫堂曰此堂名

明倫今日君臣之義何在遂大哭觸柱死妻妾亦殉于官署未

邀卹典私諡貞愍先生范志云成化二年舉賢良授應天教諭

嘉靖壬午二月十四日殉節癸未四月初二日部議卹典賜諡

貞愍後次子昂蔭入太學諸說參差今姑從張氏族譜仍附錄舊志俟放

汪志

董環字良儀一字臣儀號翠榆仁壽曾孫父庠字文序且耕且讀足不入城府構一丈室吟嘯其間額曰時習齋因以自號環府學廩生正德中歲貢入都冢宰某因學使者薦致幣聘堅辭不就後冢宰敗人服其遠識時苦重役當事者搆其弟名挺然身任不以累弟及役久廢業唯日事觴詠怡情衡泌卒年六十四以子份秩贈通議大夫

汪志

趙金字淮獻號心山自號若雪逸仙系出宋濟邸數傳居南潯博學強記工詩文善畫尤精於醫劉麟願應祥張寰文徵明結峴山會邀之入社不應

按范志作與諸君子結社峴山譌

正德中詔徵奇能隱

士有司薦舉敦促再三終不應晚年知府李頤重其名五辟鄉賓亦不應家故貧夷然不以屑意所居當闔闔中閉戶讀書入

南潯志

卷十八

人物一

八

門者肅然宛如深壑行高潔非其義介然不可奪亦不爲矯亢之行當武廟末年詔徵天下書畫士如楊循吉高簡未免呈身卒受辱歸金獨超然卒完其節六十卽爲壽藏自爲生祭文輓

詩自是不復出年八十九無疾端坐而逝是爲萬厯庚辰九月

五日記鄉賢

按胡府志羅縣志鄉賢祠皆無趙金吳興藝文補朱國禎趙徵君傳序云潯名鎮也三百年來無一

人祀於學宮甚耻之顧心山先生尙津津在人口也是亦謂其可祀而未及祀然攷朱絳平涵府君行實有云舉趙處士之鄉賢則當時實曾入祀卽國禎所舉不知何時黜去也子藻孫雋皆能世其家學其壻陸岳

金所自擇傳以醫行亦惇至雋字廣業後以字行更字長文號

印渚力學攻詩頤刻千言不竭教授里中人無知者董斯張方

學爲詩與訂交自是詩學大進後因命其子說受業焉晚遊江

西亦無所遇老於布衣崇禎壬午卒雋子棐字去非貧愈甚嘗

欲覓三百錢包麥飯附航入會城赴試不能得其後人竟以廢疾不娶而絕

汪志

董份字用均一字體化號潯陽山人環子嘉靖丁酉舉鄉薦辛丑成進士吏部觀政選庶吉士授翰林院編修與纂修會典轉右春坊右中允管國子司業事世宗齋居西宮簡儒臣橐筆侍直親擢翰林學士得乘騎出入禁中青詞多出其手尋加太常少卿賜一品服晉禮部右侍郎賜飛魚服支從二品俸轉吏部左侍郎兼翰林學士掌詹事府事會修承天大志爲副總裁賜蟒服時壬戌正月也先是甲辰癸丑兩充會試同考官丙辰典武會試戊午主試北闈己未復充會試同考至是總裁南宮賜有東觀總裁之章所錄士最稱得人加工部尙書仍管吏部左

南潯志

卷十八

人物一

九

侍郎以父嘗困於諸生建議貢生就教職者並除近地爲著令焉陞禮部尙書兼翰林學士內直如故時郊社廟祀率遣官代奏言天神無兩格之理請罷一切祕禱需次揆席忌者間之給事中歐陽一敬論劾奪職爲民歸里與唐樞蔣瑤爲逸老堂之會時比宋之耆英洛社焉收卹族人創義田築義宅義塾又爲義倉而義掩於富晚年鄉民鼓譟不勝斂避以病卒遺命毋書吾故官以白布三尺題曰耐辱主人足矣時萬曆二十三年年八十六子道醇字子儒初名元功字懋德號龍山癸未進士行人司行人晉南京工科給事中事後母曲盡孝養先份卒年五十二道醇子六嗣成嗣茂嗣昭嗣昕嗣暉斯張嗣成斯張自有傳嗣昭字叔敬號中條以孝友稱年二十一舉乙未進士禮部

觀政僅五十日歿於京邸嗣斯字季爽附監生善畫山水得石門宋旭筆法哭母嘔血病遂不起人以爲董季子死孝嗣暉字幼函附監生有孝行早卒

汪志

紀濂字宗周號明齋其先汴人宋南渡居金陵元時有紀秀者徙潯居焉父廷鉞字威之號泉石高行不仕濂少篤友愛弟嘗被誣抵獄傾家往救得出嘉靖丙午舉於鄉入都館嚴嵩家理義自閑嚴敗不及謁選光州知州州故爲貪墨者所魚肉民不堪命乃下令罷供億平收發除罰鍰禁賤市省里甲諸賧民者悉去之民相慶得生州介淮黃汝漢之間冠蓋絡繹取道旣悉革諸費無以應士大夫或銜之藩府中貴人爭益甚適有行州中見所布令察其實驚曰彼方自苦豈獨嗇人至有引車郭外

南潯志

卷十八

人物一

十

驅過曰毋苦紀君爲也然事皆有宜無已甚廩傳減而不乏徒役少而無道亡久之更稱便焉民好訟而多盜尺布斗米以上或愬監司下州株連坐罪不勝數濂閱獄大笑輒盡論釋報允遣出州仇氏者大盜也聚黨剽光黃間歷數守捕弗獲一日眾忽擁仇至愕問之則諸被釋者轉諭其黨同奮死縛以報効者也大喜勞釋者案仇而赦其黨民遂安堵轉工部營繕司員外郎改刑部河南司隆慶元年遷兵部車駕司郎中未任以疾卒年六十族孫縱羣字眾甫號太傅泰昌庚申恩貢南直隸靈璧訓導遷靖江教諭陞太和知縣調廣東永安知縣獲巨盜五人亦仿濂法勸諭釋放盜佯感泣而仍不悛幾以縱盜獲譴幸當軸鑒其無他得引疾歸温體仁少時嘗與縱羣同學後柄國政

屢遣人存問縱羣於寒暄外無一語及私濂又有族子有林字

子茂禮部儒士嘗割股療父病以孝稱汪濂孫象台字汝瞻號

宣符好古力學餼于縣庠貢入北京國子監紀慶曾宣符先生家傳異才

天挺每當落筆奇情橫溢董斯張書紀宣符扇頭授廣西河池州同知廉

潔自矢邊民安堵陞宣山知縣移任荔波忻城隆安俱有政稱

以病歸甲申春北都告陷憤懣不食者累日明年夏大兵渡江

諸郡縣降服恐後象台自以世食明祿猶偕故國遺臣日夜部

署兵食思為魯陽戈之揮未及發順治丙戌正月以憂卒年六

十三家傳

陸充齡字子久號抑齋先世自嘉興遷潯充齡幼孤事母至孝

嘉靖壬子舉人江西高安知縣調繁永豐民懷吏畏鯁直忤時

南潯志

卷十八

人物一

十一

罷歸年八十一卒子以載字處厚號秀源初名德望隆慶庚午

應天舉人福建福安知縣因俗而治案無留牘縣人立祠祀焉

福甯州境濱海水利使者屬以載治堰民不擾而功完固至今

號陸公堰陞四川叙州府通判丁外艱歸遂不出壽至八十五

汪志

溫應祿字以庸號古渠嘉靖癸丑進士時殿試策例排偶應祿

獨以逸氣散行縱筆淋漓上奇之擢第三人授翰林院編修會

河南山陝地震死者相望海賊汪直糾倭入寇江西俱被殘破

應祿語政府及大司農曰生民塗炭矣荒於天災又荒於海寇

盍以蠲振請於上曰無言事者應祿即草疏畧云國家太倉之

粟太府之錢計其羨餘堪給度支今之議救災議振荒者曰宥

罪曰蠲宿逋夫宥罪則長惡而縱奸蠲宿逋則胥吏侵漁頑梗
霑惠總無益於良民臣請恩蠲本年田賦俾人人實受聖澤奏
上不行踰年暴卒官應祿性純孝善承親志雖在史館每以不
得祿養爲歉所爲詩文氣邁豪古而仕不展志壽不享年人皆
惜之

縣志

溫應聘字一渠希明長子由監貢歷任兵馬司指揮四川提舉
使靖江王府長史進階朝列大夫

溫氏家譜

少時常入留都宿逆旅

遇一生方巾布袍喟然而歎問之曰應試無貲將徒行歸耳應
聘立解囊出金五兩遺之不記其姓名及官兵馬司申相國時
行居政府申出潯陽董宗伯之門謂宗伯子給諫某君曰君與
溫氏有交乎曰姻也曰溫氏一渠丈君知其人乎曰今南城兵

南潯志

卷十八

人物一

三

馬司是也相國驚曰某故人也爲人長者君語之某日過我相
國覽揆日也應聘弗肯往給諫強之至期公卿畢集應聘投謁
遄返門者馳騎遮留相國亟降階攜手入閣門謝客而獨與應
聘飲竟日爲言向者逆旅事人於是始知相國爲應聘布衣交
而不言也陞四川鹽課提舉司提舉成都殷富有吏作奸價騰
踊應聘廉得其情治以法巡按御史吳某旌之曰長才雅能振
刷厲志卓有操持奸吏畏其威遠商懷其惠而以兵馬司時他
事左遷靖江左長史王雅重應聘朝罷從容延訪應聘熟於典
故爲陳祖宗朝睦親至意所以增建削奪始末王倚之如左右
手尋以老乞歸賜額曰良輔方應聘之爲四川提舉也相國以
書貽之其畧曰僕方逆旅貧困時於公素無平生之舊公乃慨

然援吾非世之具隻眼有仁心者不能也天下事得公等數人任之於治不難惜祖宗朝限於資格然吾爲國家人才計俟考滿時必當特薦公應聘曰吾與相國逆旅之知豈爲官階地耶堅辭之年七十相國祝以詩曰赤松遊已心初遂白首交仍感自真聊以湖中一尊酒殷勤長醉百年身感舊也年八十二卒子太學生溫棐忱朝列大夫家傳子正字涵所少穎異讀書過目成誦朱相國國禎諸生時館於長史家最愛其文後以例遊南雍聲藉六堂冠其儕偶尋貢入北雍上舍十試鎖院溫棐忱太學公家傳不遇身有隱德溫氏家傳年七十一無疾卒家傳田萬年字廣復素饒于貲好施予人有急求之無不應萬歷間歲祲民饑獨煮賑濟全活無算詔旌尙義冠帶汪志

南潯志

卷十八

人物一

張斗原名光斗字景北號文峯萬歷丁丑進士初授刑部主事有豪犯大辟託要人從大司寇居間斗竟置之法陞郎中知荊州府江陵獄起株連者眾斗以江陵輔少主十年明毅持法天下肅然朝廷之政出于一獨嫉異太過耳其刻廉務名職入不當分宜什二而株繫累累心竊憐之爲設權宜規措多方陞福建副使調補雲南平養寨苗王華之變賜白金晉右參政乞歸卒于道汪志

卒于道

朱守愚字汝明號心齋其先陝西涇陽人宋從事郎仁福從征方臘有功卒葬于潯因家焉父經字朝綱且賈且耕困於賦役守愚縣學生輒代父奔走又代之往役典庫藏先是典庫者爲有司所魚肉率破家至有雉經以殉者符下相嚮泣會御史龐

尙鵬按浙首疏行條鞭法罷一切徭賦應役有司不旬日而歸相慶如更生病弗任試投牒自免髡工某素德於守愚有逐奴乘醉與鬪而工死里豪直以攻守愚會知府李頤廉知狀推官蘇士潤又旁贊之事得白雖處貧乏人有急難恒悉力赴之宗人以踐更鬪出已資代之乃解一牧豎病風甚厲歲大禱或勸驅去曰此兒一出門卽填溝壑矣爲療治養之終身子國禎旣成進士就養入都卒于天津以國禎秩贈光祿大夫

汪志

董嗣成字伯念號青芝道醇子天姿穎敏工詩文精六書尤善草聖星緯經脈之學丹青弧矢之藝莫不旁通年二十舉萬厯己卯鄉試明年庚辰進士廷對二甲第一授禮部儀制司主事晉精膳司員外郎主客司郎中時神宗倦政皇長子未出閣鄭

南溇志

卷十八 人物一

十四

加寵有爭立意十九年十二月會帝感疾遣官禘祭慨然上疏請慎養皇躬豫教元儲大畧謂麴蘖爲腐腸之藥柔曼爲伐性之斧調攝之功不可不留意震位不可以久虛宮闈非所以養德冊立之命不可不亟行疏留中明年正月戶科給事中孟養浩疏爭降削科臣李獻可等有五不可帝大怒廷杖百除其名是日風霾日暝朝士相顧失色喧傳養浩杖斃同時諫官被斥者十一人嗣成策馬歸邸適賓客滿座飲酒不盡卮起闔戶草疏畧言諸臣所言並社稷至計黜降刑罰非復諫之具畏法懼罪非忠義之夫敢諫者皆去則所留者必畏縮與諂佞者耳安得倣儻之士與陛下共理者臣見陛下之孤立於朝廷也詰旦實封以進始出副本示同舍郎讀其疏者莫不心怖股慄謂是

且危於孟公而嗣成意氣自如易服出舍待命左掖廡下方草
疏之夕舍中兒抉戶入以母老子幼請嗣成擗襟大言曰今日
之事倡言首禍者我也誼不使孟給諫獨死我獨生且我三世
食天祿奈何愛七尺不爲明主一忠言決矣無可奪者於是舍
中兒涕泣市良藥或治木以待帝覽疏怒抵之地已復取覽嘻
曰若不畏死耶坐以出位妄言罪削籍去嗣成祖父仍世貴顯
豪富冠東南嗣成以氣節著士論多之家居讀史至馮讜請市
義策田文輒三復歎曰安得如彈鋏生自我王父乎一旦請之
祖曰大人所設義倉意在惠此一方耳盍亦推廣盛事諸所置
田園廬舍剖其什三以予民否則量其值而予之金庶幾積而
能散祖善其說卽命處分刁民所欲不遂反肆鼓譟適巡按彭

南潯志

卷十八 人物一

五

應參至湖控告紛紛久而方定人咸稱其義而歎民之不古若
也憤懣構痞疾頃之祖亡哀毀亦卒年三十六光宗卽位詔復
原官天啟三年吏部續疏闡幽贈光祿寺少卿

汪志 李宗賢考范夫人懷弟

詩注作尙寶少卿

許兆禎字培元布衣精醫術著錄于秀水太醫院使贈少保朱
儒之門儒取其所撰診翼藥準方紀醫鏡四部合名之曰醫家
四書儒曾孫貴陽知府茂時鏤板行之方書成時申時行李廷
機朱國禎均爲作序儒亦題其簡端兆禎之名海內無不知之

者

按范志以兆禎爲國朝人譌汪志

朱國禎字文寧號平涵又號虬庵居士字愚子萬曆己丑進士
改翰林院庶吉士丁外艱起補檢討戊戌分考禮闈庚子典閩

試得周起元等多爲名臣辛丑告養母湖俗逋賦紳衿免徭役
富民復事詭寄獨累貧丁會編審創議均田均役眾大譁國禎
曰是難以口舌爭因先自計田占役與編戶等眾始大服復移
書巡撫極言賣富差貧之弊計畝定役役法少變貧民得蘇其
法便于民不便于宦側目者爭起圖之尋被論壬寅丁內艱甲
辰起南國子監祭酒丙午陞右春坊右諭德請告歸里戊申江
浙大水致書撫按力請蠲卹并條上救荒略會知府陳幼學恫
瘼民隱同心區畫災民賴之辛亥轉左春坊左庶子壬子陞北
祭酒誓墓不起天啟辛酉起禮部右侍郎辭不獲壬戌入都行
至中途請告回將抵家而枚卜之命下癸亥正月拜禮部尙書
兼東閣大學士與顧秉謙朱延禧魏廣微並命閣中已有葉向

南溟志

卷十八 人物一

去

高韓爌何宗彥朱國祚史繼偕又驟增四人直房幾不容坐六
月國禎還朝秉謙延禧以列名在後謙居其次改文淵閣大學
士累加少保兼太子太保甲子春晉戶部尙書武英殿大學士
知經筵日講制誥總裁國史實錄尋加少傅兼太子太傅東南
又水疏請改折戶部以倉無現糧不肯覆國禎力言之乃改折
三分魏忠賢竊柄國禎佐向高多所調護楊漣劾忠賢廷臣多
勸向高出疏至有詬者向高愠甚國禎請容之及向高密奏忤
忠賢決計去謂國禎曰我去蒲州更非其敵公亦當早歸蒲州
謂爌也向高罷爌爲首輔爌罷國禎爲首輔廣微與忠賢表裏
爲奸視國禎蔑如其冬爲逆黨李蕃所劾三疏引疾忠賢謂其
黨曰此老亦邪人但不作惡可令善去乃加少師兼太子太師

晉吏部尚書兼建極殿大學士

沈登瀛曰諸陞轉皆本自誌行畧及請卹典疏參以府縣志封

贈表葉向高董斯張詩文集皆合府志人物傳誤

賜銀幣廕子中書舍人遣行人送歸

月廩輿夫皆如制崇禎元年遣行人存問加太保五年卒年七

十六贈太傅諡文肅子祭葬子四長緯初名紹焯次絳初名紹

烜次紹炫次紳初名紹炯絳字爾成號誠所

按董志作爾臣范志作爾繩董氏宗

譜作爾誠

縣學生廕授五軍都督府都事

按董志作內閣中書舍人

紳字公申縣

學生廕授中書科中書舍人遭家難為知府某所持會大計某

輦金入都門為邏者所獲既而賄中貴寢其事紳抗疏發其狀

事連大璫疏留中再上得旨廷杖卒絳子七錫如鑑如鎔如鉉

如鏡如鏘如鎮如錫如字宗黃號訥庵縣學生廕授中書科中

書舍人順治辛丑孔孟文訐錢纘曾通海纘曾逃匿其家被執

南潯志

卷十八

人物一

七

連染死

按朱氏譜錫如卒康熙壬寅六月初一日與朱彝尊貞毅先生墓表纘曾死日相合費之擗恭庵日記作文肅

孫閔平攷平乃壬寅歲貢雖本

姓朱而源出顧氏非文肅孫也

鑑如字有子號戒庵廕授中書

科中書舍人

按舊志及朱氏譜作後軍都督府都事

甲申之變為闖賊所執不屈

死未邀卹典私諡忠愍先生鎔如字右陶號壘庵廕授五軍都

督府都事乙酉起兵南潯帥其眾數千北拒王師尋敗被執

語不屈斷喉死其友潛抱屍以楮封喉而殮之歸其家妻王氏

一慟而絕既蘇日痛哭斷腸死明末二十年間烏程三輔臣先

後擢用沈文定灌于天啟辛酉進文淵閣温文忠體仁于崇禎

戊辰進武英殿歷首揆柄政最久三人居相距不過十里一時

傳為盛事國禎當逆璫肆虐門戶水火之際獨能不阿璫不樹

黨潔身引退性真率剴怛曾脫海寧陳公子之寃獄休休有大

臣風度而遇非其時不克盡用位至輔相家業蕭然歸田後留心典故成史概湧幢小品諸書子若孫恪守家訓不敢以貴胄驕鄉里卒能爲國捐軀國論鄉評咸推重焉

汪志

華士嶧字孺抑號傲新天民來孫父尙能縣學生士嶧萬曆辛丑進士授福建松溪知縣縣繞崇山盜立堡屯儲如敵國爲仿置鼓團營法一方有警則聲聞百里俄頃就擒又視其出入轉運之途令兵民合一置寨設堠縱火焚山逸出者卽擒以聞屯守甫匝月盜果窮餓來款梟渠魁數人四境帖然調建寧縣充丙午鄉試同考官縣吏侵蝕錢糧民好博好訟並治以法不少貸清查屯政盛署履畝親核之以卓異薦擢南兵部車駕司主事歷工部都水司郎中陳船政十弊鑄錢五利皆中窾要及管

南潯志

卷十八

人物一

式

節慎庫則懲奸吏嚴出納夙弊一清將外轉會病辭里居二年卒兩縣士民共立祠祀名宦子二仁源仁溥仁源字大生廩貢生入都依侍郎公鼐幕下

按董志作侍郎周庭乃誤以鼐之字爲姓名

時遼事紛更

當局了無成算因從容諷鼐曰遼事之壞不壞于兵餉之單寡而壞于糾彈之苛刻若熊經略之築屯而敵少卻可謂難矣乃眾口鑠金查覈逮訊何爲者當此戎馬生郊之秋得一人甚難凡有心者皆當愛惜其才乃縛手繫足俾難展布守非戰是過作推求又何爲者鼐深契其言欲疏救會爰書已成莫可挽仁源浩歎而已就選得南直隸桃源縣丞江淮大饑條陳荒政且禁遊惰嚴保甲以鯁直忤時免官仁溥字仁仲號濟之縣學生

汪志性豪邁歷遊汴洛楚閩所至卽着屐捫蘿登高作賦逾年歸

心益超曠下筆泉涌

范志

時逆璫肆虐因縱酒高歌頽然自放所

親有被劫者挺身訟之邂逅有落魄者解囊贈之病卒無子立
兄仁源季子允楨爲嗣允楨原名用梅字開先一作開山自號
青城山人少爲諸生以貢入成均往南都聞莊烈帝殉社稷慟
哭三日夜遂棄去當是時桂苻徧閩里與董漢策等議保甲多
所條略躬冒險探出沒同里紀年以義旗誣逮獨挺身保其無
他當事疑有私並下獄既廉其寃皆獲免本生母朱氏遇賊赴
水急躍入負母以不善水瀕死者數四始得渡歲祿斗粟四百
錢悉所貯散之無何史事成獄目擊諸人遘禍遂與道衲講無
生之學逍遙物外焉

汪志

莊日宣字懋昭號復我先世居吳江十三都父思始徙于潯思

南潯志

卷十八

人物一

九

字子睿號九溪禮部儒士仁厚喜施里有子亡父金者撻而投
之水急救之育於家給衣食者累歲遇歲歉輒蠲償存活甚眾
而於族誼尤厚日宣萬曆甲午舉人謁選江西廣昌知縣調繁
崇仁並有政聲舉卓異除陝西鞏昌府同知屢以邊功題敘改
廣西平樂府同知擢潯州知府會寇亂嘯聚勦撫多方四境帖
然遷桂林兵巡道按察副使致政歸所在並祀名宦立德政碑
記卒年八十同里丁樹本字仁仲號昆吾與日宣同舉于鄉山
東知縣晉泰安知州解組時民勒去思碑屢舉鄉飲辭卒年七
十五又有吳中穎字君脫號支磯王子舉人南直隸太平知縣

按董志作
太和譌

以清執歸士民立去思碑

汪志

紀滄字宗源號涵泉鄉飲賓萬曆三十四年奉恩詔例准冠帶

有司頒給清朝耆舊匾額童稚時隨生母寄養兄處嫂以馬料
豆雜飯中滄私食其豆而以飯奉母嘗其屠姓充里役簽解絲
綿入京滄憐屠老且貧遂獨任其役至則駁難壓折賠費至千
金終無怨言同里朱某老而無子自營後事售桑地與滄立券
涕泣滄惻然憫之曰是異於世之不肖棄先業供飲博而且揚
揚自得者乃退地十之一令其夫婦居之終身人有侵其田址
者滄怡然曰彼與我皆王土也卒不與校紀氏族譜

溫育仁字幼真烏程人以兄體仁蔭任應天通判署溧水知縣
有惠政邑人建祠歷官南刑部郎中縣志考績以知府用府志引疾
歸田爲人醇謹謙厚砥礪廉隅不稍苟且縣志兄方柄國而有官
不受其勇退有足多者府志

南潯志 卷十八 人物一

王振宇一名勳始居藏穀橋崇禎間同里某柄政性陰鷲外示
孤介爲莊烈帝所信任凡朝臣不附己者悉擯斥之其子弟倚
勢不法於鄉鄉人咸畏之振宇獨不爲屈後以鄉練有功例得
錦衣衛指揮屬官振宇恐爲某所中傷力辭賜官帶歸里順治

中卒王氏家譜

溫是字曰甫歲貢生績學高行子良學字叔子號大愚溫氏家譜一

號散宜縣志歸安庠生溫氏家譜端慤不苟言笑縣志晚好詩能苦吟其

思艱而詞澀觀者歎爲奇奧吳涵傳畧師事族兄璜深沈刻厲縣志以

儒學著名府志璜殉節徽州遂棄舉業與從弟灤逃名世外時當

荒亂流殍載道父嘗有餘錢散鄰里間悉焚其券不責償家業

中落處之泰然縣志

温濬字其旋號履庵生而卓犖貢入成均族兄體仁方柄國藉勢者爭爲聲援濬獨負笈入棲賢山不屑沾餘潤縣志崇禎中東

南諸名士結復社以文章節義號召天下濬亦與焉吳門徐枋見濬於復社以體仁故意頗不相得後明亡復社諸生多出試

場屋濬棄諸生服終身不出而枋匿迹太湖之濱聞濬高節屢作畫與詩貽濬濬懸之壁間曰吾與昭發時相對也昭發枋字然昭

發今日知我耳徽州司理温璜亦濬兄弟行先是璜知天下不可爲使召濬至曰吾當以死報國家宗族事恃有汝在相與飲

泣而別居無何南京失守徽州隨陷璜殺妻子自刎死濬遂隱居曰吾不忍負我兄一訣也與其友皆矢言久之其友皆變節

以去濬獨與同縣高士嚴三求及學佛人棲雲善棲雲者姓沈南潯志

卷十八 人物一

名葵明亦明諸生隱于僧者也濬爲人忠厚宗族事無大小悉

身任雖勞且怨不避戴田有温濬家傳詩文清峻拔俗刻璜遺集助其

孤郊成立人皆重之縣志

温璜初名以介字于石明史邱祖德傳別號寶忠李長祥徽州府司理寶忠温公傳生

三歲而孤府志母陸守節被旌明史璜自襁褓至壯皆稟母教林璐司理

温公傳久爲諸生有學行明史出就館穀東修悉以奉母年五十二

績學不倦舉崇禎丙子鄉試是年稭永仁温宗烈公寶忠傳母歿府志哀毀盡

禮稭傳廬于墓出入必爲文以告府志服闋例應赴禮部試時族兄

體仁爲相國秉政稭傳門生屬吏附之者如鷺全祖望推官温公傳璜慨然

曰吾清白人何苦坐權要累進身而犯眾忌耶避跡不應春官

益下帷鐙火沈酣於先正制舉業族人有因田屋爭累歲不決

各推券契赴璜求直璜裂券碎契投於地曰叔姪至親不思引分就誼乃效市井較量錙銖寧不為祖宗罪人哉族人慚愧而退璜為孝廉七載相國致政歸始上公車更今名捷崇禎癸未

科出吳給事甘來門吳甚重之全以二甲授推官得徽州下

車平反訟獄得兩造情實不喜深刻暇時與都人士敦厲行義

講求學業會流寇薄京城懷宗自縊殉國難璜聞報慟哭北

向拜曰小臣璜大行皇帝所齋祓而登也不能執干戈衛社稷

使吾君蒙于難生不如死林乃整頓疆宇稭練民兵為保障計

明年南京亦覆明清兵雲集林傳諸郡瓦解稭知府秦祖襄及諸

僚屬皆遁明璜歎曰城無主民且相屠府志盡攝其印召士民慰

諭之明激以大義縣授兵登陴舊府志左僉都御史休寧金聲糾

南潯志

卷十八 人物一

集義勇保績溪黃山分兵阨六嶺璜與相犄角且轉餉給其軍

通鑑而徙家屬於淪坑村舍府未幾聲敗璜嚴兵自守明恆引

佩刀歎曰此身當付汝陸心源吳同官某某以功名來誘璜峻

詞拒絕稭已知事不可為急取郡中助餉姓氏冊焚之縣區分

後事攜幼子託居停方養重九月稭降人黃澍為反間引清師

入全傳璜趨歸村舍明闔戶服朝服北面再拜拔劍稭殺其長女

寶德次殺其妻茅妻女皆延頸就死吳興詩存乃索筆書百餘字略

曰世受國恩一死圖報妻與長女已俱殉幼子季女如其不容

并殺之可李遂自剄府頸血淋淋濺地因連刃手怯破喉未死

目炯炯不閉稭幕府命舁之至視其創處相謂温先生何苦我

握兵南來未見有如温先生者温先生何獨苦懸賞購醫醫至

不受兩手據創處裂其喉而死李傳年六十一耆民汪正本方時

照等具棺衾成禮而殮合殯璜暨茅氏淑人與長女寶德復祀

璜於二賢祠因璜故更祠名為三賢歲時奉祀不衰稽傳至雍正

四年祀縣學忠義祠縣志乾隆四十一年 賜諡忠烈四庫全書提要祀

鄉賢縣志璜平居寬厚未嘗有疾言遽色與體仁最友于如同懷

兄弟然始終無幾微攀援意林傳體仁死其家有潤仁者鄉舉拆

糊名得之相顧曰此烏程家也置之副科而璜無以此指之者

論者以比之史氏彌堅彌鞏方南都以防亂揭逐阮大鍼璜曰

阮大鍼為真小人錢謙益則偽君子真者易知偽者難測斯人

得志即小臣亦當裂麻爭之況同寮耶時人不以其言為然而

不知其言之中也全傳年老服官稟慈訓不少衰林傳讀書得大要

南溟志

卷十八 人物一

三

李傳注名復社第一集不以兄在相位見擯于清流吳興子旨召

早歿郊瑞學於田間以承父志祁瑞留新安亂定僕人攜之歸

稽傳

董斯張原名嗣暉字然明號遐周又號借庵道醮第六子廩貢

生按董志作原名嗣暉清羸善病汪志獨行孤嘯范志自號瘦居士於生計

最拙獨耽於書手錄不下百帙泛覽百家旁通二氏生平契厚

皆海內名士汪志如吳郡范長倩雲間董元宰同郡潘昭度韓求

仲凌茗柯沈千秋諸公日與往還范志商榷著述汪志而篤好論詩

與曹能始吳北海王亦房韓人穀范東生吳凝父孫孟樸范志結

社聯吟力扶詩教留心吳興掌故一為藝文補一為備志伏牀

咯血猶兀兀點筆年四十三崇禎元年卒按吹景集靜齋齋誌跋云廣曙識東藏寺

報國寺石刻亦稱董廣曙蓋斯張一名廣曙譜所失載。汪志

董說字若雨號西庵自稱鷓鴣生斯張子幼時謁開元寺聞谷

大師廣印錫名智齡事母至孝畢生孺慕不衰年十四補弟子

員旋食廩餼出太倉張溥門工古文詞江左名士爭相傾倒而

姿稟孤特與俗寡諧按詩萃云名著復社沈登瀛曰攷吳勳復社盛於崇禎己巳庚午數年後更國變遂棄諸生改姓林名蹇

字遠遊號南村亦稱林鬍子又稱槁木林皈依靈巖繼起大師

宏儲名之曰元潛字俟庵屏迹豐草庵宗親莫覩其面精研五

經尤邃於易方言地志星經律法釋老之書靡不鉤纂少未嘗

作詩酉戌以後始為詩以寫其空坑崖海之思樂府出入漢魏

丙申秋削髮靈巖縣志更名南潛字月涵按明詩綜云字寶雲一作月巖號

南溥志

卷十八 人物一 十四

補樵一號楓巢又名本以雲遊四方浮湘上衡岳至長沙見陶

汝飛傾蓋言歡晤寓公黃周星曰此古之傷心人也展桑海遺

民錄黯然而別已歸吳中主古堯峯寶雲院時往來於洞庭之

西小湖及溥溪補船庵之間甲子母亡葬畢歸山遂不復至嘗

寓吳之夕香庵一當事屏輿從訪之聞聲避匿當事歎息而去

年六十七示寂夕香時康熙丙寅五月六日也子樵牧耒舫漁

村說戒諸子棄舉業以韋布終其身兄弟六人確守家訓村早

卒餘並有聲汪志樵字裘夏號蔗園董氏著書修行為滄海之遺

民而與耒學尤拔出詩亦澹蕩俊偉各擅一場學者宗之幾成

南溥詩派說既為僧諸子皆稱弟子各命以法名曰靈璧樵靈

珏耒旨徑牧旨勝舫又有旨然即村也唯漁名無攷說所著書

甚夥樵等貧不能齊刊門人紀官慮其久而散佚爲刻遺文總目冀遇好事者梓以傳焉

汪志

陳忱字遐心號雁蕩山樵其先自長興遷潯閱數傳至忱讀書晦藏以賣卜自給究心經史稗編野乘無不貫穿好作詩文鄉薦紳咸推重之惜貧老以終詩文雜著俱散佚不傳

汪志

董汝煌字幼文號胎簪父嗣昂字仲頰號寧寓喜施子家雖落猶好義不衰汝煌縣學生甲申後閉戶著書嘗謂經學不明舉業家壞之也士欲明經不當以舉業爲逢時之具初治詩已而學易研精數載與族弟說姪漢策晨夕討論時號上林三易漢策爲小人所搆訟幾蹈不測汝煌挺身爲之辨雪潯上有恃才妄作者汝煌聞而歎曰古來史家非有人禍必有天殃况不知

南潯志

卷十八

人物一

三

而作難乎免於今之世矣已而大獄起諸與名者皆伏法晚年患足痺自稱跛隱年七十五卒子震蚪字鱗九府學生戚友有急需傾囊無所吝死則經紀其喪恤其孤鼎革時荏苒竊發首畫防禦之策人有固志鎮賴以完先汝煌卒

汪志

董式字印先明歲貢生不赴廷試甲申後絕意進取屢舉鄉飲

賓固辭

汪志

莊允城字君維世居吳江之陸家港允城始徙南潯歲貢生爲復社遺老子廷鑑字子美年十九中拔萃選旋目盲因史遷有左邱失明厥有國語之說遂欲著成一家言初故相朱公國禎取國家大事記及公卿章疏誌狀命胥鈔錄數十帙廷鑑得之爰招致賓客日夜編輯爲明書書垂成而廷鑑卒無子允城流

涕曰我當先刻其書而後爲之置嗣書凡百餘冊所附參訂姓氏二十四人皆一時知名士烏程令吳之榮見廷鑑所著多忌諱語遂持以要賂莊氏史獄竟拒之吳至吳江於坊間得是書卽往吳江縣呈首事發董志執允城及廷鑑兄廷鉞與弟姪等之列名於是書者皆論死而發廷鑑墓焚其骨籍沒其家產其列名之同產昆弟子男年十五以下者并妻子俱論戍廷鉞字佐璜明諸生才華最富七歲能詩著有百尺樓詩稿罹禍時年僅二十四茗上詩鈔選其詩作嚴三史虎邱志作嚴戍云廷鑿允採子字美三詞翰俱妙廷鑿長子濟字曰鱗十歲補博士弟子員以文名遣戍瀋陽震澤沈鏞至戍所設奇運策救之歸濟更姓王有半硯齋詩稿莊君佩者允城從弟也獄急時君佩竭力營救

南潯志

卷十八

人物

美

并給衣食復盡收十八人骸骨歸葬於祖塋之側莊西雍允城族子在都知難發命善走者日馳五百里至家使區處後事越五日邏者始及門廷鉞妻潘氏媵僕計阿翁隨潘至戍所事主母備嘗荼苦主母死土人欲火葬阿翁以死爭得免乃收拾遺骸走萬里歸葬莊氏史獄